

Kwa baka zliya tsasliti Piyer Kwəma dza ghwəmməə gha sənataa dzəkən zliya na

Piyer ntsa ta səda Yesəw tsasli na zliya na. Kaa mbəzliy nəw Yesəw tə hidī ghəngħən ghəngħən tsasliti na, aa niy tsaslanaghəshi nahwəti kwa taŋa (nighəm mbə vəh 3:1). Ma ghala vəghwə tsa tsasli na nana zliyay, aa niy sənay ndal tereə ta mətiw kə (nighəm mbə vəh 1:14). A dī na mbəzli kəsəvə kwəma Hyala bānavəshi na va bekir dəvə, əntaa ghən tsa shi taa zay ti, va tsəgha tsaslanaghəshi na zliya na ki.

Avanay njasa nəwva kwəma mbə zliya na:

Vəh 1 Piyer gəzanshi kaa mbəzli va njasa nza dimə tə har tsa harvəshi Hyala, ka canshi njasa dza ghəshiy mənī sa bānavə ghəshi nefer shi kaa Yesəw, ka gəzanshi njasa nza kwəma Kəristəw va ka sa katanə na, ghəci Piyer də'wə ghən tsa ci na, ndə ndəgha fəti ta nzəy tsa nzəyəhwə Kəristəw tikə tə hidī.

Vəh 2 Piyer gəzanshi a ghəshi ndəghwə ghən tsa shi wəzə va mbəzliy bənīpə nəw kwal Hyala va dzar kwa dzərvə. Ka bənīpə shi vay, kwəma jikir na ghəngħən ghəngħən ka ghəshiy mənī, war ngədī mbəzli Kəristəw ta nəw kwal tsa shi va na na mbəla ghəshi gwa'a tsəgha.

Vəh 3 A gəzanshi Piyer wəzə wəzə, ma Yesəw naciy, zhəghəkəvay naa dzəti hidfi diw. Sa nzanay, a ndəghə na mbəzli tsati titihwə tsa shi ka na gha səkə.

Səkwəpə

¹ Yən tsasli na zliya na, yən yən Shimanjw Piyer, ndə kwal tsa Yesəw *Kəristəw, zhini ndə sləni tsa cee difa. Kaa ngəjwəy ghwəy shiy banavə nefer ghwəy kaa Yesəw Kəristəw tərənəw tərənəw njasa banavə ghəy ni ghəy va kwərakwə. Ndə sləkəmmə Yesəw Kəristəw, ghəci Hyala ghwəmmə mənti na tsəgha, sa nzana lə kwal tsa nzə ghəci məni kwəma. ² Məntənəwəy wəzə hwər tsa nzə Hyala mba'a ndənəwəy zərkə, səvəri mbə səni tsa sənata ghwəy Hyala ghəshi lə Ndə sləkəpə Yesəw.

Jihəvam ta mbə nzəy tsa ghwəy nzaa sa wəzə tsa

³ A Yesəw *Kəristəw ndammə bərçi ta mbə ghwəmmə sənata Hyalaa tsəhavəmmə, nza ghwəmmə mbəə nzəy li mbə dikə tsa nzə, lə mbə wəzə tsa nzə. Dza na lə bərçi ci dikə ni kiy, mba'a ndammə ya nimabə shiy kama va ghwəmmə ta mbə ghwəmmə kwəməvə yəwən piy, lə ta mbə ghwəmmə dza njasa təbanta na kaa Hyala. ⁴ Ava lə kwal tsa tsəgha tsa ndammə na shi tərənəw ni va niy gəzəkə na bəmməshi ghala kwatanjata. Shi vay, shiy lə dimə ti shi tərənəw na ghəshi va ghwəmmə. Ma mənti na tsəghay, ta mbəə nza sa ka ghwəy

kwəməvə shi gəzəkəŋwəy na vay, nza ghwəy mbay mbəliŋwəy va shi gəmgəm ni va zapə tikə tə hidi, ma nza kwəma ghwəy nzaa sa kwətiŋ na lə Hyala. ⁵ Va tsəgha nə ya ngəŋwəy kiy, ləy hwəm sa banavə ghwəy nefer ghwəy kaa Hyalay, ə pə ghwəy jihəva ta mbə dza ghwəy təbə kwa kwal Hyala. Zhini dibay, nza ghwəy pəla mənīwəy ka mbəzliy sənata kwəma. ⁶ Ləy hwəm sa ka hwəy sənata kwəmay, nza ghwəy pəla mənīwəy ka mbəzliy mbay ndəghwə ghən tsa shi. Ləy hwəm nava ba na, ka mbəzli ka sə'wa kwəma. Ləy hwəm sə'wa kwəma na, ka pəla mənī ka mbəzliy danta fəti kaa Hyala. ⁷ Ləy hwəm dī fəti kaa Hyala ki na, nza ghwəy pəla mənīwəy ka mbəzliy dīva kwa jipə shi, ka dī nihwəti mbəzli gwanashi. ⁸ Ma sa ka gəla mənī shi tsəgha ni va tēhəshi mbə ghwəy tərəŋw kiy, ta bəŋwəy bərce dza ghəshiy dza, ta mbə ghwəy dza kwa kwəma kwa kwəma lə mətəshə sənata kwəma Ndə sləkəmmə Yesəw Kəristəw. ⁹ Ma ntsa kama gəla mənī kwəma tsəgha na va mbə nəfə tsa ciy, nja ghwəlfə na. Ka nay pi naw. Dəŋwəzl zamti na ghən ta kwəma ci jikir na niy yabanamti Hyala.

¹⁰ Va tsəgha na kiy ngwarməhiray, jihəvam lə bərce ghwəy tərəŋw, ta mbə ghwəy kəsəvə mənī kwəma harəŋwəy Hyala va, tsəhavəŋwəy na ta mənī nzə. War mba'a pə ghwəy kəsəvə mənī nzə tsəghay. Ka dza ghwəy tərəŋwəy dzəmbə mənī *kwəma jikir naw. ¹¹ Ghalaba kiy, ghəpə

1:5 1:5-6 Tit 2:11-12 1:6 1:6 Gal 5:22-23 1:7 1:7 Gal 6:10
 1:11 1:11 2Tim 4:18; Ndə mbəlipə: 2:20; 3:18; Tit 3:6

tifa ya jəwəw, ta ghwənamtəŋwəy kwal dza Hyala ta dzəti pətsa sləkə Ndə sləkəmmə Yesəw Kəristəw ghəci ndə mbəlimmə. Ma pətsa va kiy, pa' kwa ndimndim dza ghwəmməə nza ti.

¹² Va tsəgha nzana, war mbə zhinee gəzanwəy kwəma va. Ya tsəgha sənata ghwəy gwanata, mba'a ghwəy garəŋwəy lə bərçi tə kwəma katan na va bənivə ghwəy. ¹³ Ghala vəghwə tsa nzee tə ghwəməra tikə tə hidīy, e sənay, wəzə na yən zhiniy gəzanwəy kwəma va ta mbə ghwəy nza fərghe fərghe. ¹⁴ Sa nzanay, e sənay, dikə tərə vəghwə tsee tə hidiw, tsəgha niy gəzara Ndə sləkəmmə Yesəw Kəristəw niy nza. ¹⁵ Ava va tsəgha dzee jihəva ta məni ya namaba kwəma mbata bərcee məni nzə nana. Ta mbə ghwəy zəzə kwəma va taa nza, ya hwəmba nzə, ləy hwəm sa kee mətira.

Mbəzliy nay dikə tsa nza Yesəw li lə mətsə shi

¹⁶ Kwatanay, a ghəy niy gəzanwəy njasa niy səkəy Ndə sləkəmmə Yesəw *Kəristəw lə bərçi ci dikə ni. Əntaa ghwəy taa bərkə na, kwəma nja mbəraghwəti ka məndi vaa pəghəvəə slatəŋwəy ghəy, pə ghwəy ma. Lə mətsə ghəy nay ghəy dikə tsa Yesəw Kəristəw. ¹⁷ Ghala vəghwə tsa bānci Didi Hyala shəndəkə lə dikə kaa Yesəw Kəristəwəy, tifa niy nza ghəy. Mba'a ghəy favə Hyalaa tanəti shiy gwanashi tə dikə ghənzə mbə gəzə, a kəy: «Favə tə ghwəy, ava ghəci na zəghwee dee, tərəŋw yən vəshi ti» kə. ¹⁸ Ghala gəzə na va kwəma vay, tifa niy nza ghəy də'wə

ghen tsa ghøy kwasəbə Yesəw Kəristəw mə kəlan tsa dəwdew tsa. Mba'a ghøy favə gaka məli va lə slimim ghøy, ghənzə mbə gəzə kwəma səəkə mə ghwəmə.

¹⁹ Sa nata ghøy kwəma va tsəgha ki na, mba'a ndanəy bərçi tərənəw, ta zləba kwəmaa niy gəzəkə ka gəzəkə kwəma Hyala va niy nza. Wəzəba məni ghwəy məhərliy dzəkən kwəma va na kwərakwə. Sa nzana, kwəma vay, nja ghwə kwa gərkəwa vaa tsə ka məni wən mbə kwəsli na. War ə pə ghwəy məni məhərliy dzəkən pa' sa ka pi waliy, fəcava kiy, Yesəw ghəci sasərkwə kwa kədi pi na, ta tsahwəy dza na ta məniəwəy wən pi mbə nefer ghwəy.

²⁰ Kwa taŋa kwəma dəe ghwəy sənata wəzə wəzəy: Kwəmaa niy gəzəkə ka gəzə kwəma Hyala va niy nza mba'a ghəshi tsaslati tə Zliya, səvəri mbə sənata kwəma ndə ngəri niy səəkə kwəma vaw, ghəshi lə sənata kwəma shi niy bə na kwəma vaa səvəriw. ²¹ Sa nzanay, kwəma tifa mbə kwəma ghyaghya tsasliti ka gəzə kwəma Hyala, mba'a ghəshi tsasliti lə sənata kwəma shiw. *Safə tsa Hyala dəwdew tsa niy səəkəy naa dzəmbə məhərli shi, maa niy gəzə ghəshi kwəma gəzanshi Hyalaa səvəri.

2

Kwəmaa dzəkən ka bənipə nəw kwal Hyala dza kwa dzərvə

¹ Njasa niy tsahwəshi ka gəzə kwəma Hyala ka dzərvə va mbə mbəzli Hyala mbəradzəy. Tsəgha dza nihwəti ka bənipə nəw kwal Hyala dza kwa dzərvəə tsahwəshi mbə ghwəy nana kwərakwə. Ta səkə dza ghəshi ta bəniŋwəy kwəma dzərvə. Saa dzaa zantəpə. Dzəghwa fiyəkə ghəshi dzaa ndəghamti Ndə bənipə kwəma tsa niy mbəlantishi mbə kwəma shi jikir na. Mbə kwəma mənī ghəshi va tsəgha nay, kwa kwəma jəw na, ta səkə dza Hyalaa zamtishi. ² Kwal mbə mbəzliy dzaa nza mbə nəw kwəma shi va ha'wə ha'wə naw. Tə mbərkə kwəma shi va tsəgha ki na, ka mbəzli dza ka gəzə kwəma gəmgəm naa dzəkən kwal Hyala tsa katan tsa. ³ Ka bənipə kwəma dzərvə vay, tərəŋw ka ghəshiy maw shi mbəzli. Ka ghəshiy dza na, ka slasla dzərvə, ka ngədīŋwəy ta mbəə kwəmavə shi ghwəy. Mbəradzəta slanti Hyala ngwəvəə dzəkən shi, kwa kwəma jəw na kərəp dza naa səkəə zamtishi.

⁴ Ya ka kwal Hyalaa niy mənī *kwəma jikir na niy nzay, niy zlashi Hyalaw. Aa niy kəəsəvəshi, mba'a shakambəshi mbə ghwə, mba'a niy zlashi mbə kwəsli dīkwədīkwə na, pa' fəca dza Hyalaa səkə ta mənī ngwəvəə dzəkən mbəzli. ⁵ Ya mbəzliy niy mənī kwəma jikir na mbəradzə ghala vəghwə tsa kar *Nəwe kwərakwəy, niy zlashi Hyalaw. Aa niy ghwənīkə yam təhay pətsa tə hidī, mba'a ghəshi zamti mbəzliy niy mənī kwəma jikir na. War Nəwe ghəci

2:1 2:1-22 Zhəwdə 4-13 2:1 2:1 Mt 7:15 2:3 2:3 1Tim 6:5
2:4 2:4 1Pi 3:19-20; Zhəwdə 6 2:5 2:5 3:6; 1Pi 3:20

saa niy gəzəpə kwəma katan na na saa niy mbəli ti na, mba'a mbəzli ci mbərfəŋ kwasəbə. ⁶ Mbəzli mbə məlmə *Sədəm lə *Gwəmər difay, a Hyala niy slakən ngwəvəə dzəkən shi, bərkidə ndamtishi lə ghwə, lə məlmə shi gwa'a. Mbə kwəma va tsəgha kiy, ə camshi na kaa mbəzliy yi ma fəti və, ta mananshi ngwəvə dza na tsəgha, kə. ⁷ Ghala pətsa va na, mba'a Hyala niy mbəli ti *Ləwtə. Sa nzana, ntsaa məni kwəma dī Hyala ghəci. Dalalay Ləwtə niy nza mbə sa ngəra'wə va nəfə tsa ci sa zhanci na, va kwəma jikir na məməni mbəzli. ⁸ Sa nzana, war mbə shi Ləwtə niy nzəyəy tsəgha lə wəzə tsa ci vay, mətse ci na, mbə nata kwəma shi va jikir na məni ghəshi, ka favə, na gəzə ghəshi gəzə gəzə na lə sləmə ci vici va vici va. Dzəghwa tərəŋw nəfə tsa ci ka zhanci, sa dī ma na tsəgha ki.

⁹ Ma mbə gəla kwəmaa məmənta va tsəgha lə mbəzli mbəradzə vay, ə citəmmə na, njasa sənay Ndə sləkəpə, kwal tsa dza naa mbəli ni ci mbəzli səvəri mbə kwəma ngəra'wə tsa kən shi, lə njasa sənay na pətsa dza naa fə mbəzliy məni kwəma jikir na ti, kala ndəghə vici dza naa sla ngwəvə shi ti ta sanshi ngəra'wə. ¹⁰ Kwatama dzəkən mbəzli nja mbəzliy bəli ti məni va war shi səkwa hwətəl tsa shi ti, dzəghwa mba'a ghəshi zhəghəti dikə tsa Hyala, ka shi kama vəri ti.

Mbəzli ka bənipe nəw kwal Hyala va dza kwa dzərvə na shi gəzanwəy ya va kwəma shi. Ma na nashiy, shi gwərsə ghəshi və tifa

2:6 2:6 Ghava 19:24-25; Lk 17:29; Zhəwdə 7 **2:7** 2:7 Ghava 19:1-16 **2:9** 2:9 Zhəwbə 4:7; 1Kwər 10:13; ShiZhn 3:10 **2:10** 2:10 Zhəwdə 7-8

ya jəwəw! War kwəmaa kəli ghən tsa shi ka ghəshiy məni gwa'a tsəgha. Dza mba'a ghəshi fati ndərə tə kwəma mbəzli Hyala dikə dikə ni mə ghwəmə, ka tsəərəshi. ¹¹ Ya ka kwal Hyala, ghəshi shiy tanəti ka bənipə nəw kwal dzərvə va tə dikə lə bərçiy, pəla tsəərə mbəzli Hyala va dikə dikə ni mə ghwəmə ghəshi kwa kwəma Ndə sləkəpəw. ¹² Ka dzərvə vay, war kwəma kama ghən tiy məni ghəshi. Ka məni shiy nja shəkwareshi yakə məndi ta həənishi gwa'a tsəgha. Dza ghəshi tapə dzəmbəshi mbə tsəərə shi kama kwal tsa shi li shi, shi sənashi ma ghəshi. Na kwa gwa'a nay, ta bakwamtishi dza Hyala, njasa ka məndi vaa bəkwə shəkwareshi kwərakwə. ¹³ Ta zhananshi ngəra'wə tsa shi dza Hyala, njasa sanamiy ghəshi va kaa nihwəti mbəzli kwərakwə. War shi gəmgəm ni dī vəgha shi ka ghəshiy məni, ka vəshi tərəŋw ta mənishi ya havəghwə. Ka ghəshiy dzay, ka nzəy lə ghwəy, ka zəmə shiy kwa pətsa kwətīŋ tsa lə ghwəy. Ha'wə tərəŋw nava kwəma tə ghwəy tsəgha ki. Ka ghəshiy dzay ka vəshi ta ngəngədīŋwəy. ¹⁴ War pala mi'i mbə ghi ta ghwərghwər gwa'a tsəgha na nashi kwəma kavə ghəshi. Ka dali vəgha shi va məməni shi jikir ni tepəw! War ka pəla ngali mbəzli daw daw bərçi ni kwa kwal Hyala, ta shikəshiy dzəmbə kwəma jikir na va. War gəna ka ghəshiy dīy dzəghwa jəba shi na nashi. Niva mbəzliy, mbəzli bazlamti Hyala na ghəshi. ¹⁵ Na nashiy,

2:11 2:11 Zhəwdə 9 2:12 2:12 Zhəwdə 10 2:13 2:13
 Zhəwdə 12 2:14 2:14 Mt 5:28; 2Tim 3:6 2:15 2:15 Bəla
 22:7, 17; Zhəwdə 11

a ghøshi sømøshi kwa kwal tsa katanj tsa, ka zlønerøshiy dzømbø gamba læ dza shi. Mba'a ghøshi nøwhwø søøbø tsahwøti ntsa mbøradzø va, niy nø møndi *Balam, kø møndi sløn tsa ci, zøghwø Bøwsø. Saa niy dī vaa møni war kwøma jikir na, ta mbø ghøciy kwømavø gøna ti. ¹⁶ Dza mba'a Hyala nabøti Balam *ndø gøzø kwøma Hyala tsa va, va jikir tsa mønti na va. Ghala vøghwø tsa vay, mba'a kwantømcø gøzanakø kwøma nja ndø ngøri, kwømaa søøkø maa mønta. Mba'a makøti ndø gøzø kwøma Hyala tsa va nøghøtaa ghøci møni kwøma dishøti dishøti na va.

¹⁷ Ma gøla mbøzli nja shi gøzanjwøy ya niy, yømyøm na kwøma shi, læ pøtsa mbasøshi yam ti. Yøm ghøshi læ kwølebi van tsaa sliy va, mba'a safø pamtishi. A Hyala gwømanti pøtsa dza naa kølishi kwa, mbø kwøslī tørkwøsl na. ¹⁸ Ka ghøshiy dzay, ka møni føgø læ pø'wø kwøma kama ghøn ti zlanjlanj. Ka mømøni shi maw vøgha ndø, ta mbø ghøshiy zhiniy ngødføhwø mbøzliy niy mbølikøvashi vaa søvøriishi mbø mbøzli mbø kwøslī dība. ¹⁹ Ma ka mbøzliy pø'wø shi va vaa ni kaa mbøzli ka ghøshi vaa ngødiy: «Ghwøyøy, kwømaa dzaa sløkønjwøy tībaw! Ghwøy dza naa gwøra ghøn tsa ghwøy» ka ghøshiy ni. Ya ghøshi dø'wø ghøn tsa shi, ghøshi ka gøzø kwøma va na, mevivi kwøma jikir na va dzaa zamtishi ghøshi dība ki. Sa nzana, ya namafa kwøma nza børci ndø daw vøy, mava tsa nava kwøma na ndø.

20 Mba'a kə ndə niy sənay Yesəw *Kəristəw Ntsaa sləkəmmə, Ndə mbəlimmə, mba'a mbəlikəvərivay mbə dəvə bərçi shi tikə tə hidī dzaa zamtəpə, zhini na, mba'a zhini zhəghəghəvay ləy hwəm ka zhini ghəshiy məni mazə dzəkənəy, kwa kərni kwəma mbəzli vay, gəmgəmta dza naa nza. Wəzəba na kwa taŋa dība. 21 Wəzəbaa niy ghati ma ghəshi sənay kwal Hyala niy nza na, kən na nzana, mba'a ghəshi sənanti shi dī Hyala, lə ni dī ma na gwa'a na, dza mbərəkə, ghəshi zlata məni kwəma gəzanakəshi Hyala ba. 22 Ma kwəma mənti ghəshi va tsəgha na kiy, war we' kwəma gəzə məndi va mbə zliya lə fir na. Saa ni va: «Kiri zhiniy zəhwə vənəhwə tsa ci» kə. Zhini na, ma kə ba na: «Ngərdə tsa yabanti məndi dəwdew tsa zhiniy hənambəvay mbə rədibə ba» kə.

3

*Ta zhəghəva dza Yesəw *Kəristəw zhəkə*

1 A madigahira, avanata kwa baka zliya na sana tsasliŋwəy ya. Ma kwəma pəlee mbə zliyahi tsasliŋwəy ya va bakə ni gwa'ay: Ə dee gəzanwəy shi sənashi ghwəy mbəradzəshi ta mbəə fərgəhə məhərli ghwəy ta təkəə dzəkən shi wəzə wəzə. 2 Ka dee ghwəy zamti ghən ta kwəmaa niy gəzə ka gəzə kwəma Hyala dəwdew ni mbəradzəw. A Ndə sləkəmmə Yesəw Kəristəw ghəci ndə mbəlimmə ghwənəkəŋwəy

ka kwal ci ta bəniŋwəy shiy. Kwəmaa niy gəzaŋwəy na va səvəri kwa miy shi ta məni ghwəyəy, əntaa ghwəy zamti ghen ti diba ma. ³ Ma kwəma gwərantee dī ghwəy sənata wəzə wəzəy, ge'i lə kwa kərnī vəghwə na, ta tsahwəshi dza nihwəti mbəzli, ka məməni shi gəmgəm ni dī vəgha shi, mbəzli vay, ta sawaŋwəy dza ghəshi. ⁴ Ma dza ghəshiy niy: «Ya sa nə Yesəw ta zhəghəva dzee zhikə, kə kiy, kwəma na tsahwə ma na kia? Avanaŋ sanay, a jijihimmə bəkwəshi, shaŋ ghəci ta zhikəy. War njasaa niy nza shiy va ghala ghava hidīy, tsəgha tsəghavashi na ghəshi sana nashi» dza ghəshiy ni. ⁵ Gəla mbəzli tsəgha ni vay, a ghəshi sənay: «Lə kwəmaa səvəri mbə miy nʒə niy mənti Hyala hidī lə ghwəmə, mba'a bəkəvəri hidī mbə yam, mba'a təhəvəri kar hidī lə yam» kə ghəshi, lə dī shi zləba ma ghəshi kwəma va. ⁶ Lə yam bəkə naa dzəti hidī niy zamti Hyala kwa taŋa shiy niy nza tikə tə hidī diba. Sa niy səəkəshi yaməy, mba'a ghəshi zləghwəhwə pətsa tə hidī gwa'a gwa'a. ⁷ Tsəgha na kwəma ghwəmə nata ghwəmmə na, lə hidī ni gwa'a sənʒənva. A Hyala gəzəkə: «Lə ghwə dza ghəshiy ndiva» kə. Sa nashi ghwəmmə tsa sənʒənvay, Hyala zlazlashi na di, ka ndəghə vici dza naa səəkə ta sla ngwəvəə dzəkən mbəzli jikir ni dī ma fəti və, ma nza zamtishi gwa'a ki.

⁸ A madigahira, a kwəma tifa kwətiŋ kala

3:3 3:3 Zhəwdə 18; 2Tim 3:1 3:4 3:4 Zher 17:15; Ezhek 12:22; Mt 24:27, 48-51 3:5 3:5 Ghava 1:6-9; Ebr 11:3 3:6 3:6 2:5; Ghava 7:11-21; Mt 24:37-39 3:8 3:8 Cem 90:4

gar za ghən ghwəy ti: Va Ndə sləkəpəy, piya bələkwə mənə na, ghala mbə lə vici kwətīnəw, vici kwətīnə na, ghala mbə lə piya bələkwə bələkwə mənəw. ⁹ Ma kə nihwəti mbəzli mbə təkə kwəma shiy: «Ka mənī kwəma nzə kwa sləkəpə kyanwkyanwəw, kwəma gəzəkə na, ta mən dzee kəy, ka mənī naw» kə ghəshi. Mbalaa tsəgha na kiw. A na Kwa sləkəpəy, ta mənī kwəma gəzəkə na va dza na. Ghwəy ndəghə na. Sa dī na mbəzli gwanashiy səkə ta tsati titihwə kaa ngəta va kwəma shi jikir na, a ghənzə pəlashi mbə nəfə tsa nzə. Sa nzana kala dī ghənzə ndəə zay ya kwətīnə.

¹⁰ Ya tsəgha nzə kiy, sa ka vəghwə tsa va bərkəy na, ta zhəghəva dza Ndə sləkəpə Yesəw Kəristəw səkə. Na katan katan na nanzəy, war vətəghə dza naa səkə njasa ka ndə ghəli vaa səkəə dzakə ndə ta ghəli. Fəcavay tərənəw dza mbəzliy favə gaka, ka tanəti dərəzli van səkə mə ghwəmə. Ka ghwəmə dza na, mba'a zata. Mba'a ghwə dzaa səkəə ndəhwə shiy dzəy tə ghwəmə gwanashi. Cəke' dza hidfi ni, lə shi ti shi gwanashiy zashi kwərakwə ɓa.

¹¹ Njana nzana tsəgha shi va dzaa zamtəvashi kiy, ə pə ghwəy mənī məhərliy dzəkən nzəy tsa ghwəy. Dewdew kə nəfə tsa ghwəy kwa kwəma Hyala, ka dī fəti və mbə kwəma gwanata. ¹² Ə pə ghwəy ndəghə vici dza Hyalaa səkə ti. Dikəvanwəyem ta mənī kwəma wəzə na, a vəghwə tsa va mbəə mbatsəvaa səkə. Fəca

vici va dza ghwēmōē ndita, ka zata kwēdōp. Shi mē ghwēmō gwa'a gwa'a na, mba'a ghēshi ndishi kala tērē shiy ya jōw. ¹³ Ma kē Hyala kaa ngēmōē kiy, ghalaba na ta zhini dzee ngatēnwōy nahwēti ghwēmō 'war'war na, lē hidi 'war'war ni, kē. Pētsa vay, ka dza mbēzliy mēni *kwōma jikir naa nza tībaw. War mbēzliy mēni kwōma dī Hyala na shiy dzaa nza tība. Ava ghēnzē na kwōma ndēghē ghwēmōē sana.

¹⁴ A madigahira, va tsēgha dēē gēzanwōy ki, njana nzana mbē ndēghē vici va ghwōyōy, ē pē ghwōy jihōva ta mēni kwōma wōzē na. Ta mbēō nza, sa ka na sēkōy na, nza kēsanwōy dēwdēw kala kwōma rēda rēda na mbē nzōy tsa ghwōy. Nza ghwōy mbēō kwōmavē zērēkē kwa jipē ghwōy li. ¹⁵ Sēnay tē ghwōy, sa nay ghwōy tsa Ndē slēkēmōē Yesēw Kōristōw kala sēkē kyanwkyanwōy, ē dī na mbēzliy kwōmavē kwal, ta tsati titihwē tsa shi ta mbē ghēshiy mbēlishi. A Pēl zēmōēmōē tsa mbē nōw Yesēw va dī ghwēmōē tērēnw tsaslēghēnwōy kwōma va tsēgha bā. Hyala bānavē na sēnata kwōma, ta mbē ghēcīy tsasliwōy kwōma va tsēgha. ¹⁶ Tsēgha ka Pēl gēzē kwōmaa dzēkēn kwōma va kaa mbēzli mbē nihwēti zliyahī cī tsasliti na dān ni gwa'a. Mbē nihwēti zliyahī Pēl tsasliti nay, a kwōma mbē shi caslakēta dalala ta favē ndē. Ka nihwēti mbēzliy sēnata ma kwōma va kama bērci kwōma Hyala mbē nefer shiy dza na, mba'a ghēshi ghavēō zhēghanti kwōma va. Ka ladamti kwōma dī kwōma vaa gēzē. Tsēgha sēnabēshi ghēshi mbē zhēzhēghē nihwēti kwe-

mer dzar mbə Zliya Hyala dzar kwa kwal tsa gəmgəm tsa. Mbə kwəma mənı ghəshi va tsəghay, ngwəvə Hyalaa mbahə ghəshiy dzəkən ghən tsa shi.

¹⁷ Na na ghwəy kiy madigahiray, ava ghəy gəzanwəy kwəma va, mba'a ghwəy favə gwa'a gwa'a, va tsəgha gəzanwəy ya. Mənim məhərli tərənw vantaa mbəzliy yidı kwəma Hyala va ghavəə ngəfəhwənwəy dzəmbə kwəma shi va, mba'a ghwəy taa shikənwəy gəm. Ka zləba ghwəy ghəshiy ngadantənwəy tə kwəma Hyala kəsəvə ghwəy va bekir dəvə ma. ¹⁸ Ma pə ghwəy məntiy, mətsəhə pə ghwəy mətsəhə kəli ka dza kwa kwəma, lə nəw kwəma Ndə sləkəmmə Yesəw Kəristəw Ntsaa mbəlimmə, a ghəci mbəə mətsəhə məniñwəy wəzə hwər tsa ci ka mətsəhə ghwəy sənay kwa kwəma kwa kwəma.

Fal slən tsa ci mbəzli tə hidı gwanashi, ghala ndatsə ka dzar pa' kwa ndimndim. *Amin. Ava tifa kərayee ki, nza ghwəy nza.

**Zliya Yəwən kwəma wəzə naa dzəkən Yesəw
Kəristəw**

**Bana: Zliya Yəwən kwəma wəzə naa dzəkən Yesəw
Kəristəw New Testament**

Le Nouveau Testament en langue Bana du Cameroun

copyright © 2005 Wycliffe Bible Translators, Inc.

Language: Bana

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 3 Mar 2023 from source files
dated 29 Jan 2022

ae014872-94cd-54bc-869e-601bde2245b3